

24. November

Eqqortuusinnaava pisortat suliffeqarfiutaata Royal Greenland A/S-ip tunisassiorfinnik nammineq ingerlakkumannngisaminik namminersortunut aallartisartunullu tunisigaangami unammillinnnginnissamik pituttuisumik piunasaqaatitalinnik isumaqatigiissuteqartarnera (konkurrenceklausul)- pillugu, apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq Jens Immanuelson, Siumut)

Siullertut Inatsisartunut ilaasortaq Jens Immanuelson, Siumut apeqquteqaat aallaavigalugu Inatsisartut oqallinnissaannik taama ilusilikkaminik siunnersuuteqarmat Siumumiik qutsavigissuarput.

Oqallinnissamik siunnersuut ilisarnartorpassuarnik imaqartoq takusinnaavara, uaniami pineqarmat nunatsinni tunisassiorfeqarneq, tunitsiveqarneq kiisalu tunisassiorfinnik pisortat pigisaanik ingerlakkumajunnaakkanik najugaqartut tiguserisa imaluunniit pisinerisa kingunerisaanik isumaqatigiissusiortarnermut tunngasut.

Apeqquteqaallu aallaavigalugu oqallinnissamik siunnersuutip qiterpiaa tikikkutsigu tassaavoq inui-aqatigiit pigisaata suliffeqarfissuup Royal Greenland A/S-ip tunitsiviutaasa imminnut akilersinnaanngitsunik taallugit unitsinneqarsimasut ingerlatserusuttunik kiisalu najugaqartunit pisiarinerqarneranni isumaqatigiissutaasartunik naammaginnikkunnaarneq.

Misilittakkammi takutippaat isumaqatigiissutit ilaqartinneqartarmata namminneerlutik avammut niuersinnaanerisa matoqqasuutinneqarnissaat, tamassumallu kingunerisarpaa tunisassiat akissavimminnik akilerneqarsinnaasanninnerat, tassaavorlu namminersorlutik ingerlatsiniartunut unammilligassaq akioruminaatsoq akiliisinnaajunnaartarnerullu qiterpiaa.

Tunisassiorfinnimmi ingerlatsineq unammilligassarpassuaqartoq takorlooruminarpoq, siullermik tunisat aalisartumut akilerneqassapput, tunisassiorfinnilu sulisut akissarsisussaapput, qaammaq-

quteqarneq kiassarneq innaallagiartu soorunami aamma akilerneqartussaapput, illutaalu akiitsoqarfiusimappat akilersorneqartussaalluni.

Ajornartorsiut qaangerneqarpat soorunami kingunerisinnaasaasa ilagissuaat tunitsiviit ingerlatsiaannarlutik akiliisinnaajunnaartartut ikilerujussuarnissaat, akiliisinnaajunnaartussanngortereerlugit aaqqissuussisarneq ileqquuvoq inuiaqatigiit ingerlatitaaneranni kusanaannerpaat ilaattut taasariaqartoq.

Taamatullu aaqqissuussisarneq qaangerneqarpat kingunerisussaassuaa namminneerlutik ingerlatsilersut ingerlallualernerat kiisalu sulisut ataavarnerusumik suliffeqalernerat, minnerunngitsumillu aalisartut tunitsivissaminnik pisariaqartilluinnakkaminnik qulakkeerinninnissaat.

Taamatut naatsumik oqaaseqarluta oqaaseqaatissatut siunnersuut Siumumiik tamakkiisumik taperparput.

Nikolaj Jeremiassen, Siumut.